

**GWEINIDOGION Y DU SY'N GWEITHREDU MEWN MEYSYDD
DATGANOLEDIG**

**211 - Rheoliadau'r Fframwaith ar gyfer Llif Rhydd Data Nad Ydynt yn
Ddata Personol (Dirymu) (Ymadael â'r UE) 2021**

Dyddiad gosod yn Senedd y DU: 14 Rhagfyr 2020

Sifftio

A fydd angen eu sifftio yn Senedd y DU?	Bydd
Gweithdrefn:	Negyddol arfaethedig
Dyddiad trafod gan Bwyllgor Offerynnau Statudol Ewropeaidd Tŷ'r Cyffredin	22 Rhagfyr 2020
Dyddiad trafod gan Bwyllgor Craffu ar Is-ddeddfwriaeth Tŷ'r Arglwyddi	5 Ionawr 2021
Dyddiad y daw'r cyfnod sifftio i ben yn Senedd y DU	15 Ionawr 2021
Memorandwm Cydsyniad Offeryn Statudol (SICM) o dan Reol Sefydlog 30A (oherwydd eu bod yn diwygio deddfwriaeth sylfaenol)	Dim angen

Gweithdrefn graffu

Canlyniad y broses sifftio	Anhysbys
Gweithdrefn	Negyddol neu Gadarnhaol
Dyddiad trafod gan y Cydbwyllgor ar Offerynnau Statudol	Anhysbys
Dyddiad trafod gan Bwyllgor Offerynnau Statudol Tŷ'r Cyffredin	Anhysbys
Dyddiad trafod gan Bwyllgor Craffu ar Is-ddeddfwriaeth Tŷ'r Arglwyddi	Anhysbys

Cefndir

Cynigir bod y Rheoliadau hyn yn cael eu gwneud gan Lywodraeth y DU yn unol ag adran 8(1) o Ddeddf yr Undeb Ewropeaidd (Ymadael) 2018.

Crynodeb

Mae'r Rheoliadau hyn yn diddymu Rheoliad (EU) 2018/1807 o Senedd Ewrop a'r Cyngor, o 14 Tachwedd 2018, ar fframwaith ar gyfer llif rhydd data nad ydynt yn ddata personol yn yr Undeb Ewropeaidd ("Rheoliad yr UE"). Mae'r Rheoliad hwn yn ymwneud â lleihau mandadau lleoleiddio data y sector cyhoeddus ar gyfer data *nad ydynt yn ddata personol*.

Effaith Rheoliad yr UE yw bod yn rhaid i Aelod-wladwriaethau: hysbysu'r Comisiwn Ewropeaidd os ydynt yn dymuno cyflwyno mandad ar gyfer lleoleiddio data nad ydynt yn ddata personol (neu newid unrhyw bolisiau sy'n bodoli eisoes); cynorthwyo Gwladwriaethau eraill yr UE o ran ymholiadau ynghylch lleoleiddio data ac achosion posibl o droseddu; darparu gwybodaeth fusnes a hyrwyddo codau ymddygiad; ac ymgysylltu

â'r Comisiwn Ewropeaidd i adrodd ar eithriadau y gellir eu cyfiawnhau. I bob pwrpas, mae hyn yn atal Aelod-wladwriaethau'r Undeb Ewropeaidd rhag cyflwyno unrhyw ddeddfwriaeth, canllawiau neu fesur arall a fyddai'n cyfyngu ar ble y mae data nad ydynt yn ddata personol yn cael eu storio yn yr UE sydd heb fod wedi'u cyfiawnhau neu'n gymesur. Erbyn 30 Mai 2021, rhaid i Aelod-wladwriaethau'r UE ddirymu unrhyw ofyniad lleoleiddio data nad yw wedi'i gyfiawnhau, a hysbysu'r Comisiwn Ewropeaidd os ydynt yn credu bod gofyniad lleoleiddio data sydd eisoes yn bodoli wedi'i gyfiawnhau.

O ganlyniad i ymadawriad y Deyrnas Unedig â'r UE, bydd Rheoliad yr UE yn darford yn y DU, ond mae unrhyw sgil effeithiau yn aneglur ar hyn o bryd. Er mwyn osgoi unrhyw effeithiau anfwriadol ar gyfraith y DU, bydd Rheoliad yr UE yn cael ei ddirymu.

Datganiad gan Lywodraeth Cymru

Mae'r Cynghorwyr Cyfreithiol yn gwneud y sylwadau a ganlyn mewn perthynas â datganiad Llywodraeth Cymru, dyddiedig 17 Rhagfyr 2020, ynghylch effaith y Rheoliadau hyn:

- Mae datganiad Llywodraeth Cymru a'r Memorandwm Esboniadol i'r Rheoliadau yn cydnabod bod anghytuno rhwng Llywodraeth y DU a Llywodraeth Cymru ynghylch a yw'r Rheoliadau'n dod o fewn cymhwysedd deddfwriaethol y Senedd. Mae datganiad Llywodraeth Cymru yn egluro bod Llywodraeth y DU o'r farn bod yr offeryn yn dod o fewn cwrpas y cymal cadw yn Adran C9 o Atodlen 7A i Ddeddf Llywodraeth Cymru 2006, sy'n ymwneud â thelathrebu, telegraffiaeth ddiwifr, gwasanaethau rhynggrwyd ac amgryptio electronig. Nid yw Llywodraeth Cymru yn cytuno â'r asesiad hwn, ac mae'n egluro ei rhesymau yn fwy manwl yn ei datganiad ysgrifenedig.

Mae datganiad Llywodraeth Cymru yn ei gwneud yn glir nad oes gwahaniaeth rhwng Llywodraeth Cymru a Llywodraeth y DU ynghylch y polisi ar gyfer cywiro-dim ond ynghylch a yw'r mater hwn yn dod o fewn cymhwysedd deddfwriaethol y Senedd ar hyn o bryd.

Mae datganiad Llywodraeth Cymru, a osodwyd gerbron y Senedd cyn diwedd y Cyfnod Pontio, hefyd yn egluro: *"...disgwyllir y bydd darpariaethau i sicrhau llif rhydd data nad ydynt yn ddata personol yn cael eu cynnwys yn nhelerau unrhyw gytundeb masnach yn y dyfodol â'r UE. Mae cytundebau masnach rhyngwladol yn fater sydd wedi'i gadw yn ôl yn llwyr; os bydd cytundeb masnach yn cynnwys darpariaethau o'r fath, bydd y rhain i bob pwrpas yn disodli unrhyw gymhwysedd datganoledig."*

Ar 24 Rhagfyr 2020, cyhoeddodd y Prif Weinidog fod Cytundeb Masnach a Chydweithrediad wedi'i daro rhwng y DU a'r UE;

- Mae Rheoliad 1 o'r Rheoliadau hyn yn nodi bod y Rheoliadau yn dod i rym ar y 22ain ddiwrnod ar ôl y diwrnod y cânt eu gosod gerbron Senedd y DU. Mae hyn yn golygu, am gyfnod rhwng diwedd y Cyfnod Pontio a'r adeg pan ddaw'r Rheoliadau i rym, y bydd rhwymedigaethau amhriodol yn parhau i fod ar waith. Mae'r Memorandwm Esboniadol i'r Rheoliadau yn cydnabod hyn, ond mae'n disgrifio effaith y rhwymedigaethau amhriodol fel yr effaith leiaf bosibl;
- O ran arddull, mewn rhai manau mae datganiad Llywodraeth Cymru yn cyfeirio at Rheoliad yr UE yn cael ei *ddiwygio* gan y Rheoliadau hyn. Er eglurder, dylid nodi nad yw'r Rheoliadau hyn yn diwygio Rheoliad yr UE; maent yn ei ddirymu yn llwyr.

Cytundeb Rhynglywodraethol ar Fil yr Undeb Ewropeaidd (Ymadael)

Mae'r crynodeb uchod a chynnwys y Memorandwm Esboniadol i'r Rheoliadau hyn yn cadarnhau eu heffaith.

Nid yw'r Cynghorwyr Cyfreithiol o'r farn bod unrhyw faterion arwyddocaol yn codi o dan baragraff 8 o'r Memorandwm ar Fil yr Undeb Ewropeaidd (Ymadael) a Sefydlu Fframweithiau Cyffredin mewn perthynas â'r Rheoliadau hyn.